



古今事文類聚

新集
十三十一

~~X
99
74~~

逍遙文庫
文庫6
28
74



新編古今事文類聚新集卷之十

南江 富大用 時可 編

金陵 唐富春 子和 刊

六曹部

總尚書

歷代沿革尚書古官也。周為內史。周禮司會中大夫二人。戰國時有尚冠尚衣之屬。秦世少府遣吏四人在殿中主發書。謂之尚書。漢初有尚冠尚衣尚食尚浴尚席尚書。謂之六尚。武帝遊宴後庭始用宦者主中書。以司馬遷為之。遂罷其官。以為中書之職。成帝建始四年罷中書宦者。又置尚書五人。一人為僕射。而四人分為四曹。通掌圖書祕記章奏之事。各有



其任一曰常侍曹主丞相御史公卿事二曰二千石曹主刺
史郡國事三曰民曹主吏民上書事四曰主客曹主外國夷
狄事後又置三公曹主斷獄是為五曹後漢光武以三公曹
主歲盡考課諸州郡事故常侍曹為吏部曹主選舉祠祀事
民曹主繕修工作監池園苑事客曹主護駕羌胡朝賀事二
千石曹主辭訟事中都官曹主水火盜賊事合為六曹是時
尚書雖有曹名不以為號靈帝以待中梁鵠為選部尚書於
此始見曹名魏改選部為吏部又有吏部左民客曹五兵度
支凡五曹晉置吏部三公客曹駕部屯田度支為六曹而無
五兵及渡江有吏部祠部五兵左民度支五尚書宋齊梁各
有六尚書又有起部尚書起部不常興立官廟則權置事畢

省陳承梁置尚書五員後魏分尚書三十六曹曹置代人今
史譯令史書令史各一人隋改為六部尚書分司曹務直宿
禁省如漢之制唐因隋制六典建官龍翔二年改尚書為太
常伯咸亨元年依舊宋初監藩鎮之弊以尚書郎曹出領外
寄熙寧詔新官制以六曹尚書侍郎為長貳元祐置權尚書
元因唐宋舊置六部各以尚書為之長
羣書要語帝曰龍朕望讒說矜行震驚朕師命汝作納言風夜
出納朕命惟允尚書唯仲山甫王之喉舌詩士之權貴不過尚
書漢官解詁尚上也言最在上總領之也釋名尚猶奉也百官
言事當有案平處奏之故曰尚書同上尚書萬事之本朕所責
成也而廩秩儉薄甚非治體康帝起居注漢明帝詔尚書蓋古

唐文苑英華卷一百一十一
二
德壽堂

之納言出納朕命機事不密則害成可不謹歟漢官儀天下樞

要在於尚書韋彪傳太宗謂戴胄曰尚書總國綱維失一事天

下有受其弊者戴胄傳漢置五曹今分六尚近喻喉舌遠譬掌

樞隋江總表出納王命敷奏萬機蓋政令之所由宜選舉之所

由定斯乃文昌天府隋百官志文昌政本司會要經况其五曹

斯納百揆南史八座之任非賢莫居蔡謨疏臣聞尚書百揆翊

亮萬機故天上尊北斗中樞陛下有南垣左轄柳子厚遜官表

尚書職在機衡官禁嚴密後郎顛傳入作納言光耀紫極事証

集影組文昌升簪清覽傅儀傳獻善宣美楊雄箴綜事分務發

揮政源魏志王肅云

詩句尚書北斗尊顏真卿集持衡留藻鑑聽履上星辰杜甫北

斗司喉舌東方領縉紳赤管隨王命尚書踐台斗並同上

尚書總庶事官人承法憲魏應棟詩解組便歸閑處士折花莫

笑病尚書歐公朝罷人人識鄭崇直聲如在履聲中東坡上方

行賜尚書寫路人不識呼尚書但見凜凜雄千夫我如懷祖拙

自謀正作尚書已過優並同上王述字懷祖與義之齊名而義

之輕之杜尚書氣與秋天香

古今事實

猶天喉舌

李固疏曰陛下有尚書猶天之北斗北斗為天喉舌尚書陛下

之喉舌李固傳

擢任喉舌

事類彙編卷之十一

卷之十一

三

德壽堂梓

後漢左雄虞詡上疏薦之曰雄有王臣蹇蹇之節宜擢任喉舌之官必有弼正之益由是拜尚書

試對第一

後漢翟酺時尚書有關詔將大夫以上試對政事第一天文道術以第一者補之由是酺對第一拜尚書焉本傳

早拜見重

蔡景歷拜度支尚書舊式拜官在日午後景歷拜日適逢駕幸玄武觀在位皆侍宴帝悉景歷不預特令早拜其見重如此

委以老成

晉山濤轉尚書表辭年老詔曰方今多事嘉謀良圖委以老成帝喜得人

梁明少遊知名之士位都官尚書簡文帝謂人曰我不喜明少遊作尚書喜朝廷得人南史

典定舊制

伏湛字惠公拜尚書典定舊制袁松漢書

閑練舊典

李固薦楊淮閑練舊典且有幹用宜在機密特拜尚書益都耆舊傳

明習舊章

王博拜尚書明敏習漢家舊事分紀

明習故事

侯霸光武時拜尚書時無典故朝廷又少近臣霸明習故事每春下寬大之書奉四時之令皆霸所建

典樞機

韋彪上疏曰欲急世所務當先除其患源在尚書典樞機天下事一決之不可私也華嶠後漢書

典密機

尚書唐虞官也龍作納言詩云仲山甫王之喉舌秦改稱尚書漢亦尊此官典機密也漢官儀

即古六卿

魏世事統臺閣重內輕外故八座尚書即古六卿之任也衛盧久居斯位不忝厥職魏志

制法九品

陳羣為尚書制九品為官入之法同上

謹言正直

朱穆為尚書謹言正直謝承後漢

方毅廉貞

黃琬方毅廉貞為尚書續漢書

魏朗寒謬

魏朗字少英入為尚書再升紫微寒謬禁省不屈豪石謝承後漢書

荀緄寬敏

荀緄字伯條拜尚書緄性明寬敏於衆職以厲群僚秉機乎正直道而行是時内外公卿大夫莫不敬憚同上

宜釋温厚

高馮正觀初上五事曰如尚書八座人之所責成者也宜釋温

厚修潔者任之尚朴素華浮偽使家識孝慈人知廉耻自然禮節興矣本傳

妙選德望

唐元宗欲用牛仙客為尚書張九齡諫曰不可尚書古之納言有唐以來多用舊相居之不然歷踐內外清貴之地妙選有德望者充之仙客本河湟一使典耳拔升清流齒班常伯此官邪也通鑑

舉觴見屬

後魏肅宗舉觴為群臣曰袁尚書朕之杜預故以杯屬元凱侍坐者莫不仰羨北史

上疏薦拜

後漢左雄虞詡上疏薦之曰雄有王臣蹇蹇之節宜擢任喉舌之官由是拜尚書

佩刀簪筆

尚書佩契刀囊執板加簪筆焉袁子正書又周捨問劉本尚書

官著紫荷相傳云挈囊竟何所出荅云張安世傳云囊簪筆事武帝數十年注云囊橐也近臣簪筆以待顧問南史

班詔賜珠

顯宗拜鍾離意為尚書時交阯太守張恢坐贓千金徵還伏法以資物簿入大司農詔班賜群臣意得珠璣悉以委地而不拜賜帝怪問其故對曰孔子恐渴於盜泉之水曾子回車於勝母之門惡其名也此贓穢之寶誠不敢拜帝嗟歎曰清平尚書之

言乃更以庫錢二十萬賜意轉為尚書僕射後本傳

鄭崇履聲

前漢鄭崇字子游為尚書僕射數諫諍上納用之每見輒履聲本傳上笑曰我識鄭尚書履聲

杜預武庫

杜預為尚書預益萬機不可勝數朝野稱羨號曰杜武庫言其無所不有王隱晉書

叱梁冀帶劍

後漢張陵字彪仲為尚書貞歲朝梁冀帶劍入省陵叱冀令出救虎賁奪其劍百僚肅然冀弟不疑曾舉陵孝廉謂曰昔之舉君所以自罰也陵曰今申公憲以報私恩本傳

呵虎賁置弓

朱穆拜尚書正月百官朝賀畢虎賁當陛下置弓於地曰此天子弓誰敢干越穆乃呵之曰太子弓當戴之盾首之上乃敢置地大不敬即收虎賁付詔獄治罪莫不肅然張璠漢記

古今文集

雜著

上本實尚書

韓愈

愈來京師於今十五年所見公卿大臣不可勝數皆能守官奉職無過失而已未見有赤心事上憂國如家如閣下者今年已來不再者百有餘日種不入土野無青草而盜賊不敢起穀價不敢貴百坊百一十司六軍二十四縣之人皆若閣下親臨其

家老姦宿賊銷縮摧沮薨亡鬼喪影滅跡絕非閣下條理鎮服
布宣天子威德其何能及此

謝襄陽李夷簡尚書撫問啓 柳宗元

某啓當州負外司馬李幼清傳示尚書委曲特賜記憶過蒙存
問捧讀喜懼淚然流涕慶幸之深出望外伏惟尚書鸚立朝
端風行天下入統邦憲出司主憂控此上游式是南服凡海內
奔走之士思欲修容於轅門之外躡履於油幢之前譬之涉蓬
瀛登覽閩不可得而進也某負罪淪伏聲銷跡滅固世俗之所
棄親友之所遺敢希大賢曲見存念是以展轉歎歎晝誅宵興
願為厮役以報恩遇瞻仰霄漢邈焉無由網羅未辭縱羽翼而
何施囊橐方堅雖虎豹其焉往不狂踴踴懇懇之至謹奉啓起

居輕黜威嚴倍增戰越

上河陽烏尚書欲獻文啓 柳宗元

伏以尚書以碩德偉才代著勳烈兩河定亂三城建功鼎彝竹
帛未足云紀進臨汝上控制東方隱然長城朝野倚賴宗元雖
屏棄遐壤而飽聞德聲所恨不獲親執鞭弭以徇戎伍夙夜踴
躍不克寧居伏以威稜所加任彼已震莫大之績重復增崇小
子久以文字進身嘗好古人事業專當具筆札拂繡紉贊揚太
功垂之不朽瞻望霄漢戀慕交深冒黜威嚴伏增戰越

律詩

多病執熱奉懷李尚書 杜甫

衰年正苦病侵凌首夏何須氣鬱蒸大水淼茫炎海接奇峰碑

德壽堂

兀火雲昇思露道晴黃梅雨敢望官恩玉井冰不是尚書期不
顧山陰野雪興難乘

暮春陪李尚書過鄭監湖亭汎舟得過字 杜甫

海內文章伯湖邊意緒多玉樽移晚興桂楫帶酣歌春日繁魚
鳥江天足菱荷鄭莊賓客地袁白遠來過

送李遜尚書赴襄陽八韻

韓退之

帝憂南國切改命付忠良壞書星桂動旗分獸歎揚五營兵轉
肅千里地還方控帶荆門遠飄浮漢水長賜書寬屬郡戰馬隔
鄰疆縱獵雷霆迅觀基玉石忙風流峴首客花艷大堤倡富貴
由身致誰教不自強

總侍郎

歷代沿革

初秦置侍郎無員分隸三署主執戟侍官殿出則充
車騎漢因之侍郎秩四百石以其為郎內侍故曰侍郎侍郎
六卿之副凡諸郎掌更直執戟宿衛諸殿門以待衛之故通
謂之侍郎武帝時東方朔為郎後楊雄為侍郎當時謂之官
不過侍郎位不過執戟是也尚書亦有侍郎初入臺稱郎中
漢歲稱侍郎梁尚書郎入臺功高者轉為侍郎隋煬帝二年
尚書六曹各置侍郎一人以貳尚書之職並正第四品今之
侍郎其置自此始又改諸司侍郎但曰郎吏部為選部郎禮
部為儀曹郎兵部為兵曹郎刑部為憲曹郎工部為起曹郎
以異六侍郎之名唐武德六年廢六司侍郎貞觀二年復又
降為正四品下惟吏部侍郎為正四品上咸亨元年復為侍

郎總章元年吏部兵部各增侍郎一員宋以為階官至元豐官制行始有職掌元祐二年初置權侍郎從四品如未歷給事中中書舍人及待制以上者並帶權字祿賜比諫議大夫崇寧罷權侍郎建炎四年復置元仍之置六部侍郎

羣書要語位不過侍郎權纔給事黃門揚雄解嘲周歷五曹之

副建明萬事之本中臺政本思舉舊章六卿貳職今之盛選冊

之牧唐制侍郎掌貳令之職朝廷大政參議焉臨軒冊命為使

則持冊書授之四夷來朝則授其表疏而奏之獻贊幣則受以

付有司唐百官志侍郎自皇朝以來為衣冠之華選自非履歷

清要望實具美者無以居之類要侍郎二十六人四百石一曹

有六人主作文書起草後百官志

詩句客曾與天通出入清禁中李白召登金華省我入銀臺門

同上登臨憶侍郎杜三賢惟侍從卓犖傾鄒枚韓侍從近臣有

虛位公今此去何時歸幸得復中氣秦從拂天振紅旗照

海壓南荒徵入臺中作侍郎並同上響切晨趨佩煙濃近侍香

林優游侍從臣左右天子顧六一集王殿清霜綴曉班晚登

玉墀待珠旒並同上與君持囊侍帷幄同到溫室觀堯奠東坡

紫府侍臣鳴玉佩山谷大似不蒙稽古力至今猶着侍臣冠同

古今事實

閑達故事

後漢楊球字方正為尚書侍郎閑達故事章奏處議為臺閣所

後漢書

崇信本傳

彌綸舊章

謝承父嬰為尚書侍郎伏事丹墀彌綸舊章謝承後漢書

尚德之舉

侍郎官重尚德之舉顛宜富之韓愈舉韋顛自代狀

古今文集

雜著

薛左丞謝除門下侍郎表

汪藻

久參帷幄方俟黜幽進貳機衡遽叨圖舊吳寢已成之命唯深非據之憂帝寵過隆撫躬何幸謝伏念臣學從孤遠遭值聖明少誦師言每信書而違俗晚陪國論更充位以妨賢家淵鑒

之誤知保孤衷而平進肆竭股肱之力何施毫髮之功豈伊白首之衰蹤堪此黃扉之重任雖緣人之實玷詔除茲益伏遇皇帝陛下剛健粹精明覺聖疏通萬物之理灼見群臣之心猥憐撲學之無他擢處周行之至要第崇資顯秩當救有用之材方治世昌辰尤急可觀之效誓勤鞭策力振綱維與多士以同寅上承休德殞百身而圖報敢愛餘生

寄鄭侍郎

王介甫

兩朝人物嘆賢豪溟溟清風晚見衰江漢但歸滄海濶丘陵難學泰山高放懷詩酒機先息回首功名世自勞又願作公樽俎客恨無三畝斷蓬蒿

事文類聚新集

卷之十

十

德壽堂梓

送張侍郎

韓愈

司徒東鎮馳書謁丞相西來走馬迎兩府元臣今轉客一方通
冠不難平

寄王侍郎

杜甫

何限倚山水吟詩秋葉黃蠟螿集古寺鳥影度寒塘風物悲遊
子登臨憶侍郎老夫貪佛日隨意宿僧房

總郎中

歷代沿革初秦置郎中令其屬官有三署五官中郎將左中郎
右中郎將凡三署署中有郎中每自多至千人分隸三署主
執戟侍宮殿出則充車騎漢因之郎中之名猶因三署本號
置尚書郎四人分掌尚書事時馮唐為郎中署長光武分尚

書為六曹每一人尚書則領六郎凡三十六郎自漢以來尚
書諸曹郎中侍郎或不兩置魏自黃初改秘書為中書真通
事郎掌詔草而尚書郎有二三人非復漢時職任晉宋
唯置郎中梁陳兩置後魏北齊唯置郎中隋以諱忠不置郎
中煬帝改曰郎唐改郎為郎中龍朔二年改為大夫咸亨光
宅神龍並隨曹改復宋元豐官制行郎官理郡守以上資任
者為郎中郎中自外郎亦自為兩等頗自履歷而授之後來
相承必欲以開升知州資序為郎中於是拜外者具改官
實歷歲月申吏部不以若干任但通理細滿入考則陞知州
乃作正郎別命詞給告常有肯初除郎官雖資歷已高且為
員外郎候吏部再申然後陞作郎中元六部各置郎中

事類彙編

卷之十

十一

德壽堂

羣書要語 舊選尚書郎極清望也 山濤啓事 鄧遐有才義論者

以為宰士之俊宜用為郎 同上 臺郎皆朝之俊選當足處事宜

辨正凝滯也 裴度奏 今以劣弱之質任督責之官以無用之才

管繁劇之任且臺郎清顯論望且充者 郭璞表 草奏郎吏之選

必資時秀 元和制詔 宜序天臺之屬 同上 濫跡星署 職類 奏揮

草臺 又參奏議頗練朝革宜從滿歲之遷俾轉分曹之次處

以彌綸之職當茲俊茂之選 宜正列星之次俾承賜筆之寵

省理辨疑時稱簡達 高選髦士以分劇曹 並同上 優遊省闈

珥筆華軒 潘岳贈陸機 握蘭建禮總郎官 劉孝儀為江僕射薦

翔于郎署 韓文 叨陪錦帳坐 漢百官志 往自星郎爰秉天憲 楊

國忠制 嘉乃令子為吾望郎 元徽之行事審規父漸制 郎官古

之元士天下之務多所關決其於損益大矣 常衮制 虞詡曰臺

郎顯職乃筮任之通階 職類 臺郎御史邦之俊茂若出宰牧守

頌聲興矣 晉起居注 晉尚書郎選極清美號為大臣之副 通典

詩句 郎官清要為世稱 韓愈永貞行 馨香粉署妍 杜 為是先帝

白髮郎 東坡 鷄舌還應共賜香 君為尚書郎坐擁百吏繁

東川得望郎坐與西爭重 並同上 喜得廊廟舉嗟為臺閣分遠

從南斗外遙仰列星文 蘇味道 郎官有錦帳 杜

古今事實

含香握蘭

尚書郎伏奏事黃門郎對揖跪受故稱尚書郎懷香握蘭趨走

丹墀 應邵漢官儀 又尚書郎口含雞舌香以其奏事各對欲使

氣息芬芳也 宋百官志

作文起草

尚書郎主作文書起草書夜更直五日於建禮門外 漢官儀

粉署丹墀

粉署郎署也以諸郎官握蘭含香故云馨香又謂之畫省以粉畫之故言粉署又省中皆以胡粉塗壁畫古賢烈士以丹朱漆地故謂之丹墀 通典

青縑白被

尚書郎入直官給青縑白綾被或以錦被給帷帳茵褥通中枕太官供食物湯官供餅餌及五熟果實之屬五日一美食下天子一等 漢官儀

夕對青瑣

黃門郎日夕入對青瑣門拜 同上

月賜筆墨

漢尚書郎月賜赤管太筆一雙喻麋墨一丸 通典

獨宿臺上

黃香為尚書郎常獨止宿臺上晝夜不離省闈帝聞而喜之 類要

常伏省下

馮豹為尚書郎每奏事未報常伏省下或自昏至明天子默使久持被覆之 擊虞三輔史錄

太微積星

後漢楊秉疏太微積星名為郎位入奉宿衛出宰百里

太微後星

太微後二十五星郎位也史記

一曰依鳥

郎位十五星在帝位東北二曰依鳥郎府也三省郎中是其職也晉天文志

號三列宿

韋湊祖叔諧正觀中為康部郎中與弟吏部郎中叔謙兄主爵郎中季武同省時號三列宿

拜舉孝廉

胡廣舉孝廉為天下第一旬月拜尚書郎恪勤職事所掌兼治兩曹續漢書梁魏武集選舉令云國家舊法選尚書郎以取孝

廉也

詔選清白

安帝元初六年詔中郎將選孝廉郎實博有謀清白行高者出補令丞尉後漢記

容儀端正

田鳳字季宗為尚書郎容儀端正入奏事靈帝且送之因題柱曰堂堂乎張京兆田郎三輔決錄

威容可視

杜軫為尚書郎威容可視華陽國志

皆須稱職

永昌五年勅六官分事四方取則尚書郎皆是妙選須稱職司

馬馬 唐會要

不可賞能

開成四年鹽鐵推官姚勗鞫問河陰黠吏得實除職方員外郎
右丞韋溫上疏以郎官朝廷之清選不可以賞能吏續通典

豈郎才邪

李林甫源乾曜執政乾曜子潔為林甫求司門郎中乾曜素薄
之曰郎官應得才望哥奴豈郎中才邪哥奴林甫小字也同上

至郎足矣

孔若思勵學擢明經庫部郎中嘗曰仕宦至郎中足矣座右
置水一石明自足意同上

自起撞郎

明帝性褊察常以事怒郎樂松以杖撞之松走入床下帝甚怒
疾言曰郎出郎出松曰天子穆穆諸僕皇皇未聞人君自起撞
郎帝赦之鍾離意傳

皆主更直

五官中郎將一人主五官郎五官郎中無賞凡郎官皆主更直
執戟衛諸殿門後百官志

撲被逕出

魏舒為尚書郎時郎選或有非其人者論者欲沙汰之舒曰吾
即其人也撲被逕出同僚素無清論咸有愧色談者莫不誅其
高晉本傳

給帳入直

尚書郎入直官給帷帳氈褥侍史二人選端正妖麗執香爐護衣服奏事明光殿 宋百官志

職典樞機

徐防補尚書郎職典樞機周密長謹奏事二世未嘗有過云 類

才堪廊廟

索靖子綝字巨秀少有逸羣之量靖每日廊廟之才非簡札之用州郡吏不足汙吾兒也舉秀才除郎中 晉書

白首郎署

馮唐以孝廉著為郎中署長白首居於郎 荀悅漢紀

一家郎官

韋庶心父子兄弟更踐郎署時稱郎官家 舊唐書

披靚青天

樂廣為尚書郎與何晏鄧颺等談講衛瓘見而奇之曰常恐微言將絕今復聞之命諸子造焉謂曰人之冰鑑也每見此人瑩然如披雲霧而覩青天也 王隱晉書

上應列宿

後漢館陶公主為子求郎不許明帝謂羣臣曰郎官上應列宿出宰百里 本紀

馮勤佳吏

馮勤除為郎中每引進帝顧左右曰佳乎吏也 移本傳

趙華高名

趙華早擅高名在宦途五十年累經貶謫蹇躓備至入仕三十

年方露省官

古今文集

古詩

天星送楊凝郎中賀正

韓昌黎

天星牢落難嗶啞僕夫起食車載脂正當窮冬寒未已借問君
子行安之會朝元正無不至受命上宰須及期侍從近臣有虛
位公今此去歸何時

律詩

和趙郎中捕蝗韻

蘇子瞻

麥穗人許長穀苗牛可沒天公獨何意恐使蝗蟲發驅攘者令
典農事安可忽我僕既胼胝我馬亦款斫飛騰漸云少筋力亦

已竭苟無百篇詩何以醺醺尤初如疏畎滄漸若决泮勃往來
供上吏腕脫不容歇平生輕妄庸熟視笑魏勃愛君有逸氣詩
壇專斬伐民病何時休吏職不可越慎無及世事向空書咄咄

送陸郎中

錢起

事邊仍戀主舉酒復悲歌粉署含香別轅門載筆過管聲出漢
苑柳色過潼河相憶情難盡離居春草多

送致政朱郎中東歸

王介甫

平生不省問田園白首忘懷道更尊已上印書辭北闕稍留冠
蓋饒東門馮唐老有為郎戀疎廣終無任子恩今日榮歸人所
羨兩兒腰綬擁高軒

喜李侍御拜郎官入省

錢起

德壽堂梓

粉署花廳入丹青紫詰垂直廬驚漏近賜被覺霜移漢王前
席穰侯許鳳池應冷後行鴈空羨上林枝

聞崔馬竝拜臺郎

蘇味道

振鷺齊飛日遷鶯遠聽聞明光共待漏清覽各披雲喜得
舉嗟為臺閣分遠從南斗外遙仰列星文

南省伴直

韋莊

文昌二十四仙曹畫倚紅簷種露桃一洞烟霞人迹少六行
柳馬聲高星分夜彩寒侵帳蘭蕊春香綠映袍何事愛留詩客
宿滿庭風雨竹蕭騷

賀楊十一新拜省郎

白樂天

文昌新入有光輝紫界宮宮墻白粉闥曉日雞人傳漏箭春風待

女護朝衣

省中郎事

岑參

華省謬為郎蹉跎鬢已蒼到來還襍被隨例且含香

嘲趙郎中

賀遂涉

負外由來美郎中望不優寧知粉署裏翻作土山頭

總負外郎

歷代沿革晉宋尚書省置負外郎分判曹事隋開皇二年尚書

二十四司各置負外郎一人謂本員之外復置郎也掌其曹
之版籍侍郎闕則釐其曹事此今負外郎所由始也通典注

歷代尚書郎各以部名為稱首或謂之侍郎皆無負外之號
前代文傳及職官要錄或有言負外郎者蓋謂負外郎散騎

侍郎耳非尚書之職也

煬帝三年每司減一郎置承務郎一

人同開皇負外之職唐尚書諸曹各置負外吏部置二人龍

朔咸亨光宅並隨改復宋元豐官制六曹郎官理郡守以上

資任者郎中通判以下資序者為負外郎雖理知州資序未

曾實歷知州及監司開封府推判官者止除負外郎元六部

各置負外郎

羣書要語

任外郎之負承諸曹之務

胡文恭行王積制

陟中臺

之局實副郎之職

王禹制

俾升文員用副郎選

公是行雍明遠制

古今事實

散郎

外郎散郎也

漢惠帝純注

副郎

韋侯以考功副郎守盛山

韓文盛山十二詩序

彌重其選

負外郎唐朝彌重其選

通典

司皆其選

職負令二十四司皆其選也

古今文集

律詩

和王負外晴雪早朝

鄭谷

紫微晴雪帶恩光繞仗偏隨鸞鷲行長信月留寧避曉宜春花
滿不飛香獨看積素凝清禁已覺輕寒讓太陽題柱盛名蕪絕

唱風流誰繼漢田郎

送鄭員外

韓翃

風流不減杜陵時五十為郎未是遲
孺子亦知名士樂人爭唱卷中詩
身齊吏部還多醉心顧尚書自有期
要路眼看知已在不應窮巷久低眉

同錢員外禁中夜直

白居易

宮漏三聲知夜半好風涼月滿
松筠此時閑坐寂無語藥樹影
中唯兩人

聽水部吳員外新詩

白居易

朱紱仙郎白雪歌和人雖少愛人多
明朝與向詩家道水部如今不姓何

十卷終

新編古今事文類聚新集卷之十一

南江

富大用

時可

編

金陵

唐富春

于和

刊

六曹部

吏部尚書

歷代沿革吏部尚書周之天官卿也漢成帝置列曹尚書四人

其一曰常侍曹光武改常侍曹為吏部曹主選舉靈帝改吏部為選部魏改選部為吏部主選部事右於諸曹尚書置吏部尚書一人宋世祖大明二年置二吏部尚書後還置一人齊梁陳皆曰吏部尚書自漢及魏授此職者並云吏部尚書若授諸曹尚書直云尚書然此官歷代班序常尊不與諸曹

同也。自魏至梁，竝第三等。梁定十八班，班多為貴。吏部尚書班十四，諸曹尚書班十三。**後齊**尚書分統列曹，**隋**吏部尚書統吏部侍郎二人，主爵侍郎一人，司勳侍郎一人，考功侍郎一人。**唐**因隋制，吏部尚書一員，正三品。龍翔二年，改為司列太常伯。光宅元年，改為天官尚書。神龍元年，復舊。天寶十一載，改為文部。至德初，復舊。總判吏部司封司勳考功四曹事。**宋**張昭為尚書，獨掌京官七品。元豐官制行，以審官東院歸吏部尚書，左選審官西院歸吏部尚書右選。**元**因唐宋舊制，吏部掌天下文武官吏選授勳封考察廉能出給制誥等事。吏部令史分掌名頭，以尚書為之長。

羣書要語：冢宰掌邦治，統百官，均四海。書周官乃立天官冢宰。

使師其屬而掌邦治，以佐王均邦國。禮太宰之職，掌建邦之六典，以佐王治邦國。同上尚書萬事之本，選部五曹之右。常集吏部尚書制輟乃鈞衡專茲銓鏡。唐太詔令辨論官材，澄汰流品。比諸內史，選妙秩清。舊制銓管九流，品藻清濁。李重集選曹條冠六卿，統百職。白集天官太宰，秩序常尊。自昔迄今，冠諸卿首。同上藻鑿流品，是資清識。唐臨冊爾其懸衡處物，虛心待士。同上文昌六卿，楊億代表。中臺職司，願講求於故實。未央朝會時，瞻近於清光。同上合左右之聯，歸簿領者，凡六十案。奏文武之士，在考覈者，逾二萬員。李清臣表天官冢宰之崇，文昌選部之重。錢表類尚書總統百度，是為古官。吏部表率六曹，茲為重任。自天官之任，人物所宗。以撥煩治劇之才，行激濁揚清之政。並

事文類聚新集 卷之二十一 職官部

同上漢革民曹魏仍東掾毛孝先以清公見美盧子巖以真固

任職張續表樂彥輔雍容自守當時恨其寡譽山巨源意存賞

拔不免與世沉浮同上東西兩漢左雄孤絕於前南北二曹山

濤莫嗣於後沈約代表自非伯象之天下稱能仲子之時人歸

德孝先之拔奇抑偽巨源之黜惡舉善然後可以銓鏡流品平

均衡右梁王筠為第六叔議吏尚書表去歲冬初國學之老博

士爾今茲首復將亞冢司雖千秋之一日九遷荀爽之十旬遠

至方之微臣未為速達任昉為范雲議吏部尚書表况今日之

選專歸尚書以一人之鑒照察天下劉毅所云一吏部兩郎中

而欲究鏡人物何異以管闕天求其博哉崔亮答劉景安書假

勢風雲非由羽翮徒得推遷就列僊俛當時曾無辟雍議禮之

名詔有銅雀獻賦之敏而政本寔繁司會攸切溫子升廣陽王

詩句曾中無水鑪敢當吏部銓山谷丘山岌岌連天峻汚水澄

澄澈底清王正崔濟掌吏部時人為之語云分紀符彩照千里

銓衡總九流劉斌和許給事傷牛尚書持衡留藻鑑聽履上星

辰杜

古今事實

周之天官

吏部尚書周之天官卿也六典又掌文官選舉判天官司勳司

封考功等四司職負令

漢之選部

吏部尚書典選舉齊紀屬二八曹靈帝末梁鶴為選部後百官志注

士願居選
梁王泰山仲通能接人士人士願居其選官頃之為吏書衣冠
傾屬梁書

時皆推美

李尚書又王尚書丘崔賓客河掌吏部皆獲當時之美

二世吏部

謝舉字言揚掌吏部舉祖莊於宋代再典選至舉又三為此職
前代未有梁書

五人尚書

謝莊子朏朏子淪淪子覽覽孫温六代五人皆為吏部尚書上同

先選德行

隋牛弘為吏部尚書其選舉先德行而後文才進用多稱職吏
見隋書

好抑文雅

唐戴胄檢校吏部尚書然好抑文雅獎法吏時以寡學為言本

一時精選

唐九齡入相用嚴挺之為尚書左丞知吏部選陸景融知兵部
選皆為一時精選分紀

十年進拔

韋時康拜吏部尚書前後十餘年多所進拔朝廷稱為廉平嘗
因休暇謂子弟曰吾聞功成身退古人常道今年將耳順志在

懸車汝輩云何子初嗣答曰大人澡身浴德名遂官成盈滿之
誠先哲所重欲追蹤二疎伏奉尊命

當舉此人

吳隱之字處默有孝行母亡每哭韓康伯母輒泣涕語康伯曰
汝後若居銓衡之職當舉此輩人及康伯為吏部尚書因進用
之遂歷清要晉中興書

始得此人

韋思謙舉進士累補應城令歲餘調選思謙在官坐公事微殿
舊制多未敘進吏部尚書高季輔曰自居選部今始得此一人
豈以小疵而棄大德遂擢授監察御史由是知名

法不如毛

毛玠為吏部尚書無敢好衣美食者魏武歎曰孤之法不如毛
尚書令使吏部用心如玠風俗之易不難

代更舉阮

魏盧毓字子家為吏部尚書魏文帝使毓自選代曰得如卿者
乃可毓舉鄭冲帝曰文和吾自知之更舉吾所未聞乃舉阮武
孫豈帝於是用豈並魏志

率人以儉

魏毛玠為東曹掾與崔琰並典選舉用皆清正之士雖於時有
盛名而行不由本者終莫得進務以儉率人由是天下之士莫
不以儉節自勵

執心平當

晉劉雄字公平遷吏部尚書執心平當本傳

稱若神明

梁范雲性機警且善屬文為吏部尚書居選部寄任隆重書牘盈案看客滿門應答如流無所雍滯官曹文墨發摘若神明時人莫不服其明瞻職官分紀

止談風月

梁徐勉為吏部尚書居選官幕倫有敘嘗與門人夜集客有虞曇求詹事官勉正色答曰今夕止可談風月不宜及公事時人服其無私本傳

清通簡要

鍾會見王戎裴楷總角曰裴楷清通王戎簡要後二十年此二

賢當為吏部尚書真是時天下無復滯才劉義慶世說

周謹廉素

太康四年詔選曹銓管人才宜得忠恪寡欲抑華崇本者尚書朱整周謹廉素以道自居是其人也其以整為吏部尚書晉起居注

不受一錢

晉鄧攸遷吏部尚書牧馬於家庭妻息食素不受一錢於人本傳

不受餅金

褚彥回為吏部尚書有一人求官袖中將一餅金因求請問出金示之曰人無知者彥回曰自應得官無假此物若必見與不得不相啟此人大惧收金而去本傳

饋餉不受

事類彙編卷之十一

江湛為吏部尚書家甚貧不營私財饋餉盈門一無所受南史

遊處不雜

袁昂雅有人鑒遊處不雜為吏部尚書梁帝謂曰齊明帝用卿為黑頭尚書我用卿為白頭尚書本傳

一字拔人

蔡克居選官荷進之徒望風畏憚初克未仕時山簡常與王衍書曰蔡子尼今之正人衍以書示眾曰山子以一字拔人然未易可稱後衍聞克正選官曰山子之言驗於今矣晉書

三為此職

謝舉遷吏部舉祖莊於宋代再典選至舉又三為此職前代未有本傳又唐常慶凡三掌選銓授平允議者與之

佩玉乘輅

晉令吏部尚書五時朝服納言饋進賢兩乘冠佩水蒼玉

佩囊簪筆

尚書佩契方囊執板笏簪筆袁子正書

毛玠柴車

毛玠雅亮公正任官清恪其典選舉拔真實斥華偽于時四海翕然莫不勵行至乃長吏還者垢面麤衣常乘柴車軍吏入府朝服徒行吏潔於上俗移於下民到于今稱之行狀

褚炫紙帽

南齊褚炫為吏部尚書炫居身清正在選部門庭蕭索賓客罕至出入左右常捧一黃紙帽風吹紙剝殆盡南史

李肅題自

李肅字偉恭善論臧否得中甄奇錄異薦述後進題自品藻曲有條貫以此人服之擢為選部尚書舉選號為得才同上

山公啓事

晉山濤為吏部尚書前後選舉周徧內外而並得其才除尚書僕射領吏部濤再居選職十有餘年每一官缺輒啓擬數人濤所奏甄拔人物各為題自時稱山公啓事山濤傳

備儀注禮

牛弘拜吏部尚書時高祖召諸儒論新禮殺輕重弘所立議眾推服之仁壽二年獻皇后崩王公已下不能定其儀注楊素謂弘曰公舊學時賢所仰今日之事決在於公弘乃不拜讓斯須

之間儀注悉備素嘆曰衣冠禮樂盡在此矣非吾所及也隋書

作考課法

盧毓為吏部尚書文帝使毓自選代曰得如卿者乃可前此諸葛誕鄭賜等馳名譽有四處八達之謂帝疾之詔選舉莫取有名者如畫地作餅不可啖也盧毓曰名不可以得異人而可以得常士王者正以循名按實為職但當有以驗其後今考績之法廢而以毀譽相進退故真偽混淆虛實相蒙帝納其言詔作考課法

被召即拜

晉少帝即位以蔡廓為吏部尚書不拜乃以王德惠代之惠被召即拜未嘗接見客有與書求官輒置書閣上及去職其封如

初時談者以廉之不拜惠之即拜事雖異而意同南史

加祿先呵

王弘自領選將加榮祿於人者每先呵責然後施行若美相賄接者必無所請人問其故答曰王爵既加於人又相撫勞便成與主分功若求者絕官敘之分既無以為惠又不微借顏色即大成然府問者悅服

與官噴笑

謝莊代顏峻為吏書峻容貌嚴毅常有不可犯之色莊風姿溫美有喧許常歡笑答之時人語曰顏吏部噴而與人官謝吏部笑而不與人官

隨時浮沉

王戎領吏部尚書自戎居選未嘗進一寒素退一虛名理一冤枉殺一疽嫉隨時浮沉門調戶選

不許江總

陳孔煥為吏部尚書太子叔寶欲以江總為太子詹事煥曰江總有陳陸之才而無園綺之實太子深以為恨自乃言於陳主將許之煥乃啓願選敦重之才以居輔道陳紀

獨識漫漢

東魏以楊愔典選嘗六十人為一申愔冷其自叙說不省文簿便次第呼之無有誤者後有選人魯漫漢自言猥賤獨不見識愔曰卿前在元子思坊騎禿尾草驢經見我不下以方翅障面我何以不識卿漫漢驚服三國典畧

下筆招怨

郭祚為吏部揚身潔清重惜官位至於銓授假令得人必徘徊久之然後下筆即云此人便已貴天當時每招怨言

搖扇厲聲

元順為吏部尚書時朱暉素事高陽王雍欲以為廷尉評頗煩託順順不為用雍撫几曰身天子之子天子之弟天子之叔天子之相元順何人以身成命順搖白羽扇徐謂雍曰高祖遷宅中上親定九流官方清濁軌儀萬古而朱暉小人身為省吏何合為廷尉清官雍曰身為丞相錄尚書如何不得用一人為官順厲聲曰殿下必如是順當依事奏問

不署紙尾

宋廢帝時蔡廓為吏書徐羨之謂傅亮曰黃門已下悉委蔡自此已上固宜共參同與廓聞之曰我不能為徐羨之署紙尾也遂辭不拜建康實錄

隨而下筆

唐裴光庭為相兼吏部尚書與中書令蕭嵩爭權不協及為吏部奏用循資格并促選限光庭卒嵩又奏請一切罷之光庭所引進者出為外職時有門下主事閻麟之為光庭腹心專知吏部遇官每麟之裁定光庭隨而下筆時人語曰麟之口光庭手秉筆當除

韋巨源以吏書同中書門下三品時要官缺執政以次用其親巨源秉筆當除十八人皆諸宰相近屬楊再思曰吾等誠負天子

巨源曰時當爾耳唐書

舉扇一揮

蕭子顯為吏書有牙氣見凡流賓客不與交言但舉扇一揮而衣冠切恨之齊書

謝朓慙色

初謝朓告王敬則敬則女為朓妻常懷刀以投朓朓不敢相見及當拜吏部謙挹尤甚尚書郎范績嘲之曰卿才人無慙亦選但恨不可刑于寡妻朓遂有慙色梁書

脩義失色

元脩義選吏部尚書在銓衡唯事貨賄授官小大皆有定價時高居者先敘上黨郡關遂求之脩義私已許人抑居不與居不

言不遜對眾呼天喝賊人問居曰白自公庭安得有賊居指脩義曰此坐上者違天子明詔物多者得官京師白劫此非大賊乎脩義失色

官有定價

元暉遷尚書納貨賄授官皆有定價大郡二千足中都一千小郡五百北史

士不問賢

崔亮後魏時為吏部尚書為停年格不問士之賢愚專以停解日月為斷同

人中作市井

袁真為監軍范正平為吏部尚書坐語袁曰卿此選還不矣護

軍哀曰止平卿何事人作市井

後主借鼓吹

梁蔡徵拜吏部尚書啓後主借鼓吹答曰軍樂有功乃授蔡徵不自量揆素我朝董然其父景歷既有締構之功宜且如啓

帝問何先

宋葉顛權吏部尚書乾道九年召對便殿賜坐賜茶禮異他日

帝曰吏部條例朕亦置一通在禁中又問卿當官以何爲先對

曰以公忠爲先帝曰卿直無忘此二字後五日除簽書越二日

兼參政楊誠齋集

上嘆看序

宋晏敦復爲吏部尚書上嘗嘆曰敦復疑重剛方當公介然行

總有序摘發清明事無奸滯山濤毛玠無以過之周平園集

諫屏鞠戲

陳俊卿謚正獻召爲吏書時上未能屏鞠戲公上疏力諫入對

上迎謂曰前日之奏備見忠謹朕決意用卿夫十一月拜同知

兼參政

因論耗費

吏部尚書張壽因對論甲庫萃工巧以蕩上心醜良醜以奪官

課教坊樂工百數日增俸給賜資耗費不貲皆可罷上曰卿可

謂責難于君明日罷甲庫諸局以酒庫歸有司減樂工數百人

中興系年錄

古今文集

吏部尚書廳壁記

孫述

吏部尚書在周為太宰之職其建設徒屬敷陳事典則周官倫
 之矣秦滅古法始置尚書漢增其制創立選部故靈帝以梁鵠
 為選部尚書是以魏改選部尚書為吏部尚書自晉宋至於北
 齊皆因之宇文朝依周官置太宰宰卿一人蓋其任也隋革周
 制復曰吏部尚書皇朝龍朔二年改為司列太常伯咸亨元年
 復為吏部光宅元年改為天官尚書神龍元年又為吏部尚書
 綜九流之要為六官之長位尊任重實在于茲自武德以來多
 以宰相兼領一彼一此更為出入才難不其然乎皇帝在位之
 二十二年缺其官選于眾乃命武都公自兵部尚書拜焉公地

惟宗英才則人傑忠孝自律矜嚴成憲式是軌度諒干衡石國
 之利也所及遠哉天鑒有唐俾多吉士踐其位者四十人嘉
 名已著於國史故事宜存於臺閣繫以日月自得春秋之義記
 其代遷更是公卿之表以備官學列為壁記焉

為李景讓議天官尚書表

李嶠

寵命載臨震悸交集鞠躬自覲屏營無措中謝臣聞俊乂在官
 百揆所以時敘名器安假九流于是咸曠事關隆替義難不越
 臣才疎行缺學淺智空十舍無千里之資一經乏三冬之教徒
 以遭逢言運玷膺籍符幸雨露之曲成遇山川之廣納遂得差
 肩冕芻比跡流品出入臺省周旋階闥鏘金鳴玉坐榮枯朽擊
 永搏風顧慙腹背自忝司衡鏡亟易星灰雖智力已窮而清通

未效朱紫多紊涇渭莫辨宜其抵罪觸網稍清官謗翻乃假寵
增服更垂天獎是用荷恩內訟以榮為憂且夫八座位隆五曹
望重典南宮之喉舌象北斗之樞機或資藻鑒奚綜賓實自非
孝先亮直彥輔公忠山濤之簡靜篤素顧譚之心精體密何以
對揚天哲厭塞人望顧斯政本實總國彙豈臣庸愚所堪乃奉
伏願迴光寢照返汗收恩察臣由衷之請於臣陳力之議則朝
端允穆天下至公四始輟在梁之譏六爻無負乘之累夫無狂
慙懼之至

辭免除權吏部尚書狀

樓鑰

寵光下逮惕懼靡遑竊以選部攸司是曰六官之長文昌攝事
亦叨八座之稱縱難求傑異之才猶當取踐別之舊臣一登仕

路二入脩門年除歲遷寢踰於始望寢驚夢愕屢蹈於危機惟
茲瑣聞幾更月館遇事輒發徒自積於怨仇忤自為多方自虞
於呵譴敢期辱獎亟賜褒遷徑由夕拜之聯擢試天官之職兼
汗青於東觀乃視草於北門揣愚分以何堪恐公言之不貸伏
望皇帝陛下收遠成漁改畀真賢俾退服於舊班庶漸伸於歸
望

謝除權吏部尚書表

樓鑰

充貞璫闥自顧罔功撮長銓曹忽蒙誤寵仰皇慈之至渥揣微
分以何堪中謝竊以選部持衡夙號六卿之長文昌聽履實為
八座之聯非素推公方不足以扼吏奸非妙有德望不足以厭
輿論雖黃織之下無參異同而搢紳之流鮮不關係宜求精敏

之彥以當要劇之司伏念臣才不逮人學徒泥古一為支郡二
 入脩門又侍上皇愧愚衷之無補親逢嗣聖荷褒擢之有加代
 言非陸贄之工批敕謝李藩之器俯徇芻蕘之論屢覓斧鉞之
 誅去省眼者五年遂躡登於冢宰離班心者一載遽首列於從
 臣禁林兼內制之文史館涉信書之筆滿盈已甚控避真回頌
 御府之襲衣益之輦帶駕天閑之良馬覆以雕鞍但喜悅親之
 私敢云稽古之效茲益伏遇皇帝陛下多能天縱盛德日新蒐
 舉異才踵登持橐之選優容棄物獨負改竿之軫宜黜而遷以
 榮為懼臣敢不深思僥冒勉竭疲庸為山公啓事之書知非所
 及守崔亮停年之格何足為勞尚幾典選之平少助官人之道

與趙尚書書

朱元晦

茲者竊聞榮被追詔入長天官夫以尚書望實之隆宜在廟堂
 參斷國論之日久夫去歲入朝登用在即而抗論極言不以利
 害之私少有回屈士論益以歸重而深恨其不少留也乃今幸
 甚天啓聖心召還故官是益將授以政無可疑者有識傳聞交
 相慶賀益不獨為門下之私喜也然今日之事益有甚難於為
 力者不審明公何以處之竊計雅懷於其大者素有定論不待
 愚者之言矣惟其小者之一二區區鄙懷竊有所疑於平日輒
 忘僭易而一言之惟高明之垂聽焉蓋天下之事決非一人之
 聰明才力所能獨運是以古之君子雖其德業智謀足以有為
 而未嘗不博求人才以自裨益方其未用而收賓門墻勸獎成
 就已不勝其衆是以至於當用之日推挽成就布之列位而無

事之不成也。今日明公之立朝，不為不久，而未聞天下有卓然可用之才出於門牆之下。自頃出臨藩服，而熹始得觀於進退官屬之際，則見明公之所與者，率多碌碌凡庸。睚眦偵伺，以希寸進之流，未有以職修事舉眾所稱，以為當舉而得之者也。而况於其學行蘊蓄，真有以大過於人者乎？今者進位於輔相之列，則所資於天下之才者，益眾而所進退於天下之才者，益重。若但以前日進退官屬之尺度取之，則熹恐天下之士所以望於明公者，有未厭也。時事如此之艱，明公之任如此之重，而所以求助者如此之狹，熹雖至愚，猶竊為明公慮之。而辱知有素，不敢不及此而一言也。伏惟寬宥，恕其狂易，試加察焉。蓋不惟明公所自舉，而凡所為屬之同列，以妨賢者之路，若宜皆在誦

指之中，則熹之虛實可觀矣。來使回自三山，熹前此已屢拜啓，薄冗姑此少申賀禮，而亦不敢為無益之空言也。未由趨拜，履舄伏乞，以時為國自重。

吏部侍郎

歷代沿革 吏部侍郎 周之小宰中大夫也。漢以來尚書侍郎，今郎中之任。北齊陸卬兄弟為相代，兵吏部郎，今侍郎也。隋煬帝二年尚書六曹各置侍郎一人，以貳尚書之職。正四品以下銓補多歸之。唐武德初，因隋舊置吏部尚書掌六品七品，選侍郎銓掌八品九品，選龍朔二年改為司列少常伯。咸亨初改為吏部侍郎。光宅初改為天官侍郎。神龍初復為吏部侍郎。天寶十一載改為文部侍郎。至德二載復為吏部侍

郎本一員總章二年加一員以裴行儉為之本員為中銓新加員為東銓通典云唐列三銓尚書掌其一侍郎分其二尚書所掌謂之尚書銓侍郎所掌其一為中銓其一為東銓**宋**

元豐官制行以流內銓歸吏部侍郎左選元豐初御史書曹言天下選人名在吏部者且萬人索其家牒以式注籍時將

改官制先詔流內銓稱尚書吏部官制行歸吏部侍郎左選

以三班院歸吏部侍郎右選三班院舊例置局禁中嘉祐間出之殿中三年罷主部元豐初又詔與審官東院流內銓各

省注簿一官制行歸吏部侍郎右選侍郎從三品掌文臣未

改秩者凡始命或有殿員皆試而後選若應遷格則團申同郎官引見於便殿稟奏改官右選掌武臣未陞朝者凡所任

而試不中者及已入官而未應選者皆勿注正闕若選路分都監將官閣門祗候都總管司承受皆以名上樞密院視朝入閣則執文武班簿對立官制尚書侍郎通治曹事奏事則同班惟吏選分領四選有所論奏則各以選事同所隸郎官

上殿續會要初置二員蘇頌左選李承之右選**元**仍唐宋制

置吏部侍郎

羣書異語小宰之職掌邦之六典八法八則之貳周禮司小宰

之職任佐平邦典選重朝倫恭我密啓屬於清鑒當勸濯纓之操不遺劉楚之材晏公類要尚書六職天官首之辨論官材澄

汰流品比諸內史選妙秩清爾其以裴王崔毛為心白集柳公用解樞機之務俾居行鏡之職唐太詔令掌銓行之品潔

宜叙九流楊億代表吏部典掌選舉至於所屬之官有行封爵

議勳庸藉功課之事咸以咨焉侍郎實二其長可不重哉南豐

擬制夫以天官之二治夏卿之選簿書繁重條格紛委苟非其

人則士之失職而無咎者多矣東坡集天官四銓總覈人物澄

清流品除孫覺制文昌一卿位次八座陸佃制吏部古之天官

而侍郎小宰之職曲阜傳堯俞制

詩句持行留藻鑑聽履上星辰注見素為吏部侍郎銓選平允

上星辰以言其親帝之旁杜南宮吾故人白馬金盤陀雄筆映

千古見賢心靡他舊注南宮為禮部非也按天官書南宮朱鳥

推行太微三公之庭將相執法即位衆星

古今事實

銓衡之任

唐掌選部流內六品以下官是為銓衡之任凡初仕進者無不仰屬通典

銓綜之司

考功員外郎劉思立子憲為河內尉思立今日亡明白選人有索憲闕者時馬載為吏部侍郎書曰無乃注冬集朝廷咸曰真銓綜流品之司可謂振理風俗也

典選十載

楊纂長於吏道所在皆有聲績俄又除吏部侍郎前後典選十餘載人論稱為允當

典選六年

事類彙編卷之十一 卷之十一 十七 使書室抄

唐席豫為吏部侍郎玄宗謂之曰卿前為考功職事平允故有此授預典選六年有令譽又盧從愿精力于官偽牒詭功檢擿無所遺銓總六年以平允聞並唐書

四代居選

房穎叔拜天官侍郎自其高祖至穎叔四代咸居選部時論榮之分紀

旬月即拜

何廣字伯始舉孝廉天下第一旬月為吏部侍郎

賜鏡以表

高唐馮為吏侍凡所銓綜時稱平允太宗賜金背鏡一面以表其精鑒焉

改職又除

唐崔玄暉拜天官侍郎每介欬自守卻絕請誦頗為執政所忌轉文昌左丞月餘則天謂曰自卿改職以來選司大有罪過或聞令史乃設齋自慶此欲盛為貪惡爾今要卿復舊任又除天官侍郎

大革前弊

唐朱璟為吏書與侍郎李人盧從愿等大革前弊取捨平允銓綜有敘

不省私書

孔緯字化文權要有所私託書盈元不省並唐本傳

葦陟風來

葦陟風來

韋陟遷吏侍郎選人多偽集與正調相冒陟有風采擿辨無不
服者

裴楷風神

晉裴楷為吏部侍郎風神高邁容儀俊爽時謂之王山照人

孝基知人

隋吏部侍郎高孝基鑒賞機悟清謹絕倫房元齡杜如晦與選

行儉知人

裴行儉為吏部侍郎典選有知人之鑒見王劇與蘇味道譚人

獎用孫張

曰二十亦當掌銓衡之任後劇果為天官侍郎味道至相位

王上遷吏部侍郎典選復號平允其獎用如孫逖張鏡微皆工
時茂秀

掌選韓元

吏侍鄭果果注韓思復為太常博士元希聲為京兆士曹曹謂人

曰今年堂選韓元二子則吏部不負朝廷矣唐會要

前有裴馬

唐裴行儉馬載為吏部侍郎同時典選十餘年甚有能名時人
稱為裴馬

後有盧李

盧從愿唐宗時拜吏部侍郎中宗之後選司頗失綱紀從愿精
心調理大稱平允李朝隱同時典選時人稱曰前有裴馬後有

盧李

弘景嚴正

韋弘景轉吏部侍郎銓綜平允權邪憚其嚴正不敢干以非道

岑義勁廉

岑義進更侍時崔湜鄭愔及李元恭分掌選皆以賄聞獨義勁

廉為時議嘉仰並本傳

汰擇士類

溫彥博遷檢校吏部侍郎彥博欲汰擇士類寡術不能厭眾訟

牒盈庭時議頗譏

甄別士庶

陸正師為更侍隋承周制官無清濁彥師在職凡所任人頗甄

別於士庶同上

識刀某姓

天官郎中李至遠權知侍郎時有選人姓刀又有王元忠並被

放乃密與令史相知滅其點書刀改為丁王改為士擬授官後

即添成文字至遠一覽便曰今年銓覆萬人總識姓名安有丁

士姓名此必刀某也省內以為神明會要

冷裴畧朝

溫彥博為更侍有選人裴畧被放乃自贊於彥博稱解朝諺彥

博即令朝屏牆略曰高下八九尺東西六七步突兀當廳坐幾

許遮賢路彥博慚而與官唐新書

李下無蹊

李知遠知選吏肅然歛手又號李下無蹊徑本傳

李士多附

李李卿拜吏部侍郎俄而兼御史大夫奉使河南江淮宣撫振拔幽滯進用忠薦時人稱之在銓衡數年李卿有宇量性識博達與善人交襟懷豁如其在朝以進賢為務士以此多附之

與邊遠官

唐崔駟判吏部東銓事文帝召三銓謂之曰卿等比選令錄如何注擬駟曰資序相當問以為治之術見可否而擬之帝曰依資合得而才劣者何授對曰與邊遠慢官帝曰以不肖之才治邊民則疾苦可知也朝廷遠近皆願得人苟非其才人受其弊

尋拜吏部侍郎

便江南選

唐興元初劉滋為吏部侍郎往洪州知選事時言師興之後天下蝗旱谷價翔貴選人不得赴調乃命滋江南典選以便江嶺之人時稱舉職並分紀

開門無禁

姜晦為吏部侍郎性聰悟識理體舊制吏曹舍宇悉布棘以防令史與選人交通及晦領選事盡除之大開銓門示無所禁私引置者晦輒知之召問莫不首伏初朝廷以晦改前規咸以為不可竟銓衡得所賄賂不行舉朝服歎

選才得宜

劉林甫正觀初遷吏部侍郎初赴選者以十一月為始至春即
 停選林甫奏請四時聽隨到注擬當時咸以為便時天下初定
 川府及詔使多有未牒授官至是停省盡來赴集將萬餘人林
 甫選才銓擢咸得其宜時人以林甫典選比隋之高孝基選舉志
 人推強直

韋陟嘗任吏部侍郎有一致仕官敘五品陟判之曰青壇展慶
 曾不立班朱紱承榮無宜拜臥時人推其強直

帝謂勇決

隋楊恭仁大業初轉吏部侍郎楊玄感作亂煬帝制恭仁率兵
 經略與玄感戰於破陵大敗之軍旋煬帝召入內殿謂曰我聞
 破陵之軍唯卿力戰功最難比雖知卿奉法清慎却不知卿勇

決如此

吏不容私

蒸北海先生嘗禮維揚兵革之後省曹簿書殘毀幾盡公再執
 銓衡時為吏部侍郎熟於典故衣冠調集與朝政洽草討論漫
 無成案可攷者公援據該審徐出一言以決吏不得容其私詔
 重刊七司條勅公所建明悉著于令自是省府除授皆有案驗
 李益能撰行狀

吏不得肆

洪文安公遵字景嚴公為吏部侍郎先是選人諸曹改秩予奪
 一出吏手公乃隨事疏理吏不得肆言行錄

陳權孤寒

陳堯咨判流內銓舊制選人皆用奏舉乃得改京寺官而士有
孤寒不為人知者堯咨特為陳其功狀而升擢之仁宗實錄

孫論優伶

孫逢吉字從之進吏部侍郎朱公熹之去公力救之侍郎彭公
龜年補外又言不應為近習而逐正人一日會食部中或報王
喜除閣門祗候公曰此乃優伶嘗於內庭效朱侍講容止以儒
為戲者豈可以汚清選當抗疏力爭否則於經筵論之飛語上
聞內批為郡樓攻媿集

厲色必容

苗晉卿知吏部選事性謙柔選人有訴訟索好官者雖至數千
言或聲色甚厲者晉卿必令退容之拜吏部侍郎前後典選五年

政既寬弛胥吏多因緣為姦賄賂大行

點頭更擬

蘇晉為吏侍裴光庭知尚書事有過客被却者就籍以朱點頭
而已晉因榜院曰門下點頭者更擬光庭以為悔已出晉汝州
刺史

高枕而卧

許子儒以學藝稱長壽中官至天官侍郎子儒居選部不以藻
鏡為意委令史勾直以腹心法官之次子儒但高枕而卧時云
勾直平配由是補授失序無復綱紀道路以為口實

非錢不行

鄭愷掌選賦汚狼籍有選人繫百錢于靴上人問其故曰當今

事文類聚新集 卷之十一 二四 御書室刊
之選非錢不行

古今文集

雜著

謝轉吏部侍郎表

歐陽脩

驟膺渙渥備歷愚誠雖至辭窮固避煩言之為贖事乎今出真
回成命於已行祇受以還驚惶失節臣某 中謝伏念臣學未通
於原本材不足以經綸但知守拙以為忠每務師心而自信徒
以遭逢先帝拔自眾人久參侍從之職遂玷機衡之貳而屬木
橫啟兆嗣統膺期方為政之清明思百度之脩理內量謝薄實
憂以聖而責愚矧迫衰殘方念乞身而告病不謂皇慈曲被寵
數屢加當覃大慶之初已無功而冒賞曾未踰年之久復進秩

以切樂此蓋伏遇皇帝陛下聖政惟新用人務廣謂才難於求
備恩悅使以忘勞憫其勤劬錫以優洽雖恩踰於望表亦寵與
其憂并誓殫犬馬之微少答乾坤之造

代謝吏部侍郎表

樓鑰

伏言西掖方拜誤恩攝貳東銓復叨改命循墻莫避臨谷增危
中謝伏念臣獲落無堪迂愚自信正以經營於菽水故嘗希望
於斗升昨自外官恭趨嚴召猥廁內朝之鵷列親覩上聖之龍
飛五歷粉闈一參月寺籌邊戎幕無婉畫之可稱將命虜庭幸
歡盟之復締肩柱史詞臣之選兼官端寶牒之司初無左右之
先容盡出聖神之親擢忽承帝制俾倅天官一新龜紫之榮仍
假銓衡之長莫回成渙徒激懦衷茲蓋伏遇皇帝陛下虛以受

久明於分職憐臣孤立於官路借以末光謂臣曾歷於劇曹付
之重委臣敢不寅遵邦憲嚴制吏姦朝夕論思雖素乏嚴吾之
譽簿書期會庶免追裴馬之名

謝吏部侍郎表

鄒浩

代言西掖已員至榮列職中臺更應高選拜恩優渥撫已競慚
中謝竊以六典治邦周重天官之任三銓綜吏唐推文部之權
洪惟神考之正名肇復先王之成憲迄至今日益昭聖功宜得
真才以貳選事而臣猥從廢斥特荷哀憐俄擢實於近班獲預
聞於機要事陛下有如上帝敢萌一念之欺仰陛下何啻高山
終乏織埃之補未正空餐之責遽叨越次之升靖言思之可謂
幸矣此益伏遇皇帝陛下孝隆繼志道廣用中欲多士之無朋

故孤立者與進欲四方之不擾故愚守者并容爰舉斯心俾祇
厥序臣敢不激昂遭遇飭勵猷為念此餘生實神聖之再造誓
殫綿力稱寵祿之殊私

辭免除權吏部侍郎狀

吳永叔

渙若出綸震于聞命竊以甘泉扈從以待臣為邦家之光選部
典銓以小宰為人物之鑑匪疇宿望曷稱親除如臣者猥自選
陬躡登朝序才能甚短如鼎之不可以柱車又體近浮如玉之
不可以為穀偶值清朝之更化忽陪群彥以同升繆當記注之
筵復玷詞翰之選赤墀載筆幾瞻言動之容紅燭燃窗兩被傳
宣之寵雖曰儒生之榮遇每慚往哲之高風方戒滿盈又叨甄
擢官清易曠甫半歲而三遷恩重難酬不一月而再命倘員承

於殊渥恐交噴於煩言伏望聖慈俯矜愚悃於替書之未出擇
髦士之攸宜庶安私情允愜公論

第一辭免狀

吳永叔

重惟吏侍之選實高諸曹非知久之明不足以鑑裁流品非秉
法之正不足以檢扼吏姦比者某共貳之初以卯退朝以辰入
局與吏抱案選官滿庭愛惜分陰僅可區撥而才不周於繁劇
智不足於眇綿以所不能之人居所甚重之職因循之久易生
垢玩豈圖異渥復異陳人若貪戀恩榮冒昧以處則必以庸疎
抵於曠敗欲望朝廷特賜敷奏得從寢免庶幾上不以累聖鑒
下不以溢愚分

辭免兼權吏部侍郎申省狀

洪咨夔

蒙恩便蕃聞命兢惕竊以詞垣四禁稽緩為先選部三銓繁劇
尤甚專掌尚虞於弗暨兼官必至於多違伏念某學問空疎材
識謏陋領內史之職舉乎一而未能參小宰之職共其二以何
有雖代庖而越俎將毀瓦而畫墁欲望朝廷特賜敷奏念御馬
不容於窮力而牧羊每患於多岐俾塵舊官亟寢新命少安愚
分實戴隆私

謝吏部侍郎表

周必大

嚴近叨居夙負疎官之責武文迭試更膺換部之榮襲衣頒在
筭之珍寶帶錫章身之寵仰慙主眷俯愧輿言臣某中謝臣聞
古之銓綜存乎人今之銓綜一於法存乎人固可以得士然其
弊也嘗由予奪之不公一於法固可以滅私然其弊也或致賢

愚之同滯而况簿書紛若胥吏雜然苟稽察之弗精將混淆而莫辨欲酌古今之中制當令人法之並行庶稍戢於吏姦亦少伸於士氣豈容虛受以累明揚伏念臣性鄙習迂志卑才下早親翰墨弟為書生陳腐之談又侍軒墀初乏禁從論思之語引去則殊私之未報欲留則高位之難安方進退之靡寧忽選除之下逮肺腑抱履冰之惧面頰形槌市之羞被此光靈若為稱塞茲益伏遇皇帝陛下乾行不息日照無私知人非堯舜之難巧主奚患選衆有臯陶之舉枉直自分夫何一介之臣乃冠戴卿之列臣敢不遵承法令振拔滯淹雖微冰鑑之明上裨睿哲願守權衡之信仰助公平苟不辱知斯為報國

謝吏部侍郎兼權直學士院表

孫覲

承流支郡方叨左省之除擢貳選曹更代北扉之直麗恩深厚小已凌兢中謝臣聞虞書二載黜陟之文周官羣吏誅賞之法歷時千載分總四銓圖籍浩繁官曹猥衆諸郎寄坐老吏專家二年干戈倣擾之餘一時水火焚漂之後千瘡橫潰三霜旁穿世號把椎坐朝銅臭士無固志端若視馬曹然官不即工但直書紙尾耳深惟流弊常激懦吏使夫人皆從容而自居則誰當以奮發而為意攬轡而上粗有意於澄清奏刀欲前了無施於盤錯空慙綿力實負初心茲益伏遇皇帝陛下剛德方亨大明繼照深鑒百王之弊一清多士之源偶以乏才遂當殊獎固難有欲速之戒矯枉在馴致之功輸夙夜之勞儻遂愚人之志效涓塵之報庶逃黜伯之譏

吏部郎中

歷代沿革周官太宰屬官有下大夫蓋郎中之任也秦有郎中以其為郎侍衛居中故曰郎中漢選尚書郎初從三署郎次補之初入尚書臺稱郎中滿歲稱侍郎故郎中之名猶因三置舊號後漢置吏部郎中職在選舉魏晉用久妙於時選其諸曹郎功高者遷吏部郎中歷代品級皆高於諸曹郎魏晉宋齊史部郎品第五諸曹郎第六梁吏部郎品第四班第十一陳因梁後魏北齊吏部郎品正第四上諸曹郎品正第六上後周依周官隋煬帝改吏部郎為選部郎唐吏部郎中二人龍朔二年改為司列大夫咸亨元年神龍並隨曹改復一人掌小選未入仕而吏京司者復分九品通謂之行署其應

選之人以承入九流故謂之流外銓宋元豐官制行置吏部郎中四人尚書選二人侍郎選各一人參掌選事而分治之凡序位有品選官有格分任有職寓祿有階皆以事稽攷審核其狀實成於長貳而後行焉建炎二年詔三選各一人員元仍唐宋舊置吏部郎中二人

羣書要語

乃統胥徒是稱小選

席豫楊仲宣碑

六官之屬曹郎

首之百集除李見制

參我六典冠于諸曹云

有簿書以旌淑

應擇筆以決臧否剖疑析滯揮翰如流選部以清繁公是賴並同上銓衡庶品歷選實條六備表才盛居東之佐禮處司南之重高選髦士以分劇曹常集鄭自外制天官之屬號為劇曹初寮王琮制任參六典選重一時類要尚書正本而吏部天官

綜敘羣才以成天下之治郎於典領其選甚高

南豐除曹授制

詩句吏部提英鑒片善蒙采錄黃山谷吏部信才傑文鋒振音

響調與金石諧思逐風雲上梁沈約悼齊謝朓兩人同日事征

西今日君先捧紫泥裴度柳公綽俱為判官公綽先入為郎度

古今事實

超遷郎中

後漢吏部郎典劇多超遷者

稍遷郎中

齊庾杲之司空劉覲見而奇之曰是使江漢崇望杞梓發聲稍

遷吏部郎中參選大事齊書

舉一吏部

後魏孝文帝創置百官謂羣臣曰為我舉一吏部郎
給卿三日假尋曰朕已得之矣乃徵崔亮為之亮自參選事
三十年廉謹明決尚書曰非崔郎中選事不辨北史

不覓一吏部

褚亮每屬恒憂覓一佳吏部亮曰與縣宰徐寧海岱清士即遷
吏部

崔亮明決見上舉一吏部

劉鼎風稜

劉鼎清泰中為吏部郎中兼侍御史知雜事鼎性若寬易而典
選舊按吏有風稜五代史

阮咸寡欲

山濤舉阮咸為吏部郎中曰清直寡欲萬物不能移也世說

陸准正人

吏部郎典碎事日夜相接非但當正色而乃當能正人議郎杜點德履亦佳太子庶子崔諒中郎陸准皆有意正人其次不當審有可用者否山濤啓事

設長名榜

吏部郎中裴行儉始設長名榜列銓注期限等法又定州縣升降官資高下以為故事長名榜自此始也選萃志

定朝儀令

後魏鄒淵博覽經書太祖定中原擢為吏部郎淵明解制度多識故事與崔彥玄伯參定朝儀律令音樂及國文記詔策多淵所

為也

傾朝送別

何尚之字彥德為吏部郎告休定省傾朝送別及至郡父叔度謂曰聞汝來此傾朝相送可有幾客答曰殆數百人叔度笑曰此是送吏部郎中非關何彥德也昔殷浩亦嘗作豫章定省送別者甚眾及廢從東陽船泊征虜亭積日乃至親舊無敢相窺

百姓追送

褚翔為義興太守徵為吏部郎去部百姓老少追送出境翔居小選八清不為請囑易意號為千允選侍中

庭植嘉樹

顧憲之為尚書吏部郎其祖凱之嘗為吏部於庭中列植嘉樹

謂人曰吾為憲之植爾後果為此職

師為模楷

隋李德林為吏部郎陸昂命其子與德林周旋誡之曰汝每事宜師此人為模楷

尉得遷官

晁補之字無咎為吏部郎中有嶺外尉為獲盜八人法當改官考功謂獲盜不同處曲沮其賞持之不決尉客京久窘甚請公訴之公憫然一日當奏郎為上之七日得遷官於是吏畏服部無留事丁未錄又見張文潛集

上常目送

曾肇謚文昭官制行除吏部郎中每便殿引選人上常目送之

出殿門而已楊龜山撰行狀

古今文集

雜著

吏部郎中廳壁記

獨孤及

太微五帝星座後十五星曰郎位秦漢之君則而象之方建郎中至魏世祖分尚書曹為六郎各六人今之吏部魏之選曹也掌選舉銓覈以正公卿大夫士羣吏之品位凡廢置之柄官府之序歲終令天下郡縣會計致事而郎官起草立議操而成之然後尚書受成於郎中之選非楚金百鍊顏弓六鈞不與也故居官者不由選曹郎而進罔以見其才之餘地亦枕刀劍之刃未嘗屠大牛切大玉則雖曰我且以為鎮錡人猶疑之由其塗

而升驟必環周三臺翰飛兩掖登喉舌秉刀尺者什七八諸曹
郎莫敵也歲在乙巳河南賀若公用黃幹諒直實蒞厥位往歲
公為外郎也東曹朗然如得水鏡洽餘杭也吳人熙熙若逢陽
春今也來思八法在手操割成務彌綸舊章厥如初政常以前
哲軌躅我之韋絃而武德以來歷署鼎新者數官曹易名者五
若姓不表年不紀是廢德也將來何觀故謹而列之俾我曹之
春秋存乎右座其選部司列天官文部之目各因其所革時之
先後冠於其首以為志云

吏部員外郎

歷代沿革周官太宰屬官有士士蓋今員外之任也漢百官階
次有員外郎後周依周官隋文帝開皇六年尚書省二十四

司各置員外郎一人以司其曹之籍帳品從第六謂曹郎本
員之外復置郎煬帝三年廢尚書諸曹各置員外郎一
人吏部置二人唐龍朔咸亨光宅神龍並隨曹改復宋尚書
諸司員外郎正七品元置吏部員外郎二人

羣書要語吏部員外郎掌選院詣之南曹注其曹在銓曹之南
故謂之南曹唐六典吏部員外郎二人掌文選以三銓之法官

天下之材其投試銓注與流內畧同謂之小選唐百官志

詩句吏部信才傑文鋒振奇響調與金石諧恩逐風雲上梁沈

約悼齊謝朓吏部提英鑒片善蒙采錄黃山谷今日君先捧紫

泥柳公綽與裴度俱為判官綽人為吏部郎度作詩餞云

古今事實

吏部省眼

唐吏部郎中一廳先小銓次格式員外郎二廳先南曹次應置
舊說吏部為省眼分紀

南宮眉目

韋陟字商衡為吏部員外郎是曹在南宮為眉目在選士為司
命公執直筆閱簿書紛拏盤錯一瞬而剖劉禹錫撰神道碑

銓敘稱美

唐崔郾資質秀偉神清重雅人望而愛之為吏部員外郎好吏
不致欺寒無援者不至流滯銓敘之美為時所稱

判析有條

唐李栖筠遷吏部員外郎判南曹判析有條好吏氣奪號

為神明

簿最詳緻

韓滉遷吏部員外郎性強直明吏事在南曹五年簿最詳緻

吏事第一

裴遵度遷吏部員外郎專判南曹天寶中海內無事九流輻輳
會府每歲吏部選人盈萬遵度敏識強記精覈文贍詳而不滯
時稱吏事第一由是大知名

鈐制官吏

唐皇甫鏞為吏部員外郎判南曹凡二年頗能鈐制官吏改吏
部郎中

旌別能否

唐年徵遷吏部員外郎乾符中選曹猥濫吏為奸弊每歲選人四千餘徵性貞剛特為起請由是銓敘稱正能否旌別物議稱之

思制吏奸

紹興三十年以劉珙為吏部員外郎珙在銓曹時苦吏為奸思有以制之自命張幕設案置令式其中使選集者得出入緡閱與吏辨吏無得藏其巧人甚便之

復清選部

劉崇望字希徒轉吏部員外郎崔安潛為吏部尚書崇望判南曹滌除宿弊復清選部唐書

朕欲見父

陳傅良奏事入脩門鬚鬢如雪丞相留公正一見歎曰幾年陳君舉尚可使外補耶奏留為吏部員外郎初對上曰卿去國幾何時朕欲見卿久矣知卿抱負學問深醇有所著書進來時上臨朝淵默罕有聖語公敬謝而退以周禮說進擢秘書少監樓攻魏集

上為嬰顧

張拭召為吏部員外郎廟堂用史正志為發運使奪州縣財賦遠近騷然拭為上言之上曰正志以為非取之民對曰今州縣財賦大抵無餘不過巧為之名以取之於民耳上聞之嬰然顧拭曰論此事者多矣未有能及此者如卿之言是朕假手於發運使以病吾民也閱實如拭言即詔罷之楊誠齋集

古今文集
雜著

吏部員外郎南曹廳壁記

權德輿

漢廷尚書郎辨草制度主文書起草之任東漢方冠以曹名用諸曹功次超卓者轉遷選部魏晉已還其任寔劇國家紀律昭明官脩其方凡薦紳之倫未命為大夫者滿歲皆調於轂下啓事賦祿必先有司初上元中天官趙郡李敬玄號為稱職以覆托官簿差次裁成端本肇末不得不重乃請外郎一人顯南曹之任其後或招同曹部分主之或詔他曹郎權居之皆難其才而慎斯舉也大抵膺是命者多士必屬耳自焉以其公私能否之間不可遏也以事之委會吏之奇袞因緣詭故中若市道居

之者通明闊畧靡或深刻苟成績於是則翰飛不暇登二掖積六職得之夷易疾若傳置太原王仲舒字弘中温毅廉直清方敏資風神豪爽邁乎羣倫貞元十年冬由諸侯部從事賢良對策歷二右諫列議曹考功郎十八年實受斯命類能故也於是用堅明忠恕行理官業程品具舉尤違自絕然後以狀之成實於冢宰小宰罷退者不譴受祿者不誣恢恢然投其虛而芒刃不頓君子以弘中之道為折中矣昔春秋書士谷曰堪其事也魯語曰暑所以朝夕度君命也上因官署而舉事任春秋丘明之志也至若龍朔咸亨改復之說此皆不書

吏部分掌

封誥科

應給制誥

舊司封

應封蔭

贈遷

歷代沿革舊主爵郎北齊置主爵郎中一人隋文帝為主爵侍
郎煬帝改為主爵郎唐龍朔三年改司封大夫咸亨元年復
故光宅元年改司封郎中神龍元年復故開元二十四年復
為司封宋於右掖門置院四司誥身案並集于此以備中書
除改本司郎官各主其事淳化五年始專置官司於省內凡
官誥各以本司誥身印印之文臣用吏部武臣用兵部王公
命婦用司封加勳用司勳掌文武官將校誥身及封贈官誥
院提舉一人以知制誥充判院一人以帶職京朝官充元封
五年行官制文武誥身屬吏部蕃官誥屬兵部封贈及命婦
誥屬司封加勳并將校告屬司勳官誥院四部誥身案及吏
人隨事隸本部七年併司封司勳誥身案入吏部預書庫收

掌崇寧四年吏部專置造官誥局五年罷令尚書右選主簿
大觀元年復置尋改為官誥院仍隸左右司三年復罷歸吏
部政和三年六月詔依舊置官誥院差官二員主簿少府監
鑄印記吏部製造誥身案記為文建炎以來因仍不改元無
專曹官封誥以令史分頭掌之

羣書要語司封郎中掌封命朝會賜予之級凡爵九等唐官志
封爵之恩施於內外國之典也主以郎吏寵秩甚優曾南曲且除
王祖道制宜寵左曹之秩用優主爵之名胡文恭制

古今事實

執秩

晉文公作執秩以正其官注執秩主爵之官左傳

典封

後漢馮勤為郎中給事尚書使與諸侯封事 本傳

公權入奏

唐柳公權為司封員外郎入奏帝曰見卿筆蹟久矣因問用筆法權曰心正則筆正乃可法矣 本傳

孝武同省

正觀中韋孝武為主爵郎中與兄弟同省時號三列宿 唐史

上科舉議

宋王介甫用事議論素異還朝真之官誥院介甫欲變更科舉上疑焉公議上悟曰吾故疑此得蘇軾議意釋然矣即白召見蘇頲演集東坡行狀

此代言手

宋京鏗字仲遠參政龍茂良薦公于孝宗轉主管官誥院先是茂良帥豫章日得公牋奏之文奇之曰此汪彥章代言手也充職兩月詔從臣舉良縣令為執法官給事中王希呂以公應書即召見曰卿議論通明有用材也是日除監察御史 楊誠齋集

古今文集

雜著

官誥院題名記

虞似良

士自一命以上至于公卿凡除授誥命必繇院以給之則居是職者為甚重而不輕矣故謹其付給而守其貳令視他司為嚴唐制百官誥身分掌於其所部文則吏部掌之武則兵部掌之

宗室命婦司封掌之。考校勲績司勳掌之。國初悉因唐舊置院於右掖門之左。凡吏兵封勳四司之告舉集諸此。淳化五年始專置局。命書舍人一員提舉而以朝官一員判局事。於是職任踰重。元豐改制乃以文武官誥身悉隸吏部而以蕃官隸兵部。崇寧大觀或置或不。大抵廢則皆歸吏部右選。政和復置院仍差主管官二員。中興以來因仍不改。然自紹興至今四十餘年中。間官吏殆無有記之者。名氏則罷滯不可見。事之因循苟且豈特此哉。似良不才承乏是官。思有以紀會同寮魏君相與討究。自薛德而下得五十五人。勒諸石。庶使來者尚有考也。乾道七年十月既望記。

官誥院續題名記

丁伯桂

誥院題名石。昉於乾道七禩。紹興改元。易而大之。紹定辛卯之秋。鬱攸為診。屋與石俱燬。管建既新。亟求舊題。副集壽之。石立新。石列為一。經始於趙君與。篁成於林君泉。謂余嘗是官。論識之。欽惟皇朝以名器砥礪天下。士命詞於西掖而受給於誥。邇要使爵德賞功之意。雷行域中。光被萬物。所係亦大矣。在昔名公率多發軔于此。不但位台衡。持從橐。登要路。為足垂榮。其人節行著聞。其人勲業赫奕。一自畢見。使來者知所勸。是亦補助教道之一。紹定六年十一月既望記。

官誥院續題名記

汪詢之

乾道辛卯官誥院始創。題名石。易于紹熙庚戌燬。于紹定辛卯。今江淮大使官文趙公與篁來。允厥職。爰立一石。鴈行之。后二十

十七年當寶祐六年石當續僕適承之乃暨同僚姜君士龍闡
 辭以諗于公公捐楮二千緡佐其費及在外麾節之曾居是官
 者致助各有差于是石續而三矣恭惟國朝以好爵縻天下士
 文武之臣各以其職受命而榮辱予奪之機乃寄於盈尺之誥
 司存顧不嚴且重歟凡得策名於石者當以羔羊素絲之詩厲
 其節以綢衣惡艾之質養其才又以朝廷之所以懋德懋功者
 自懋其器業使前者規後者隨輝聯光映聲實流國家將於
 是有賴焉豈直能大其官而已是年五月既望記

勳封科 應封食邑實封 如王一萬戶郡王五千戶之類又親王
 公主應國封號之類 ○舊司勳

歷代沿革 周官有司勳上士一人凡有功者司勳詔之後周夏

官有司勳一人掌功勳之賞隋文帝立司勳侍郎二人煬帝
 改為司勳郎唐武德初為司勳郎中龍朔元年改為司勳大
 夫掌邦國官人之勳級凡勳十有二等自柱國至
 武騎尉凡十一凡有功之人合授勳官者皆委之覆定然後
 奏擬宋司勳掌賜勳定選錄用世勞凡官吏軍民應賞而謀
 有司施行者則審覆而駁其謬誤元無專曹官有勳封科以
 今史分頭掌之

羣書要語 司勳掌六卿賞地之法以等其功王功曰勳國功曰
 功民功曰庸事功曰勞治功曰力戰曰多凡賞無常輕重抵功
 周禮 掌校定勳績論功行賞職員令

古今事實

事類彙編

詞人稱首

唐張九齡遷司勳員外郎張說謂人曰後來詞人稱首本傳
郎吏得人

唐張循憲薦張嘉貞奏對侃侃武后悅擢循憲司勳郎中酬其
得人時功狀盈几郎吏不決嘉貞即為詳處廷無留牒張嘉貞傳

論安右配享

宋趙忠簡公鼎字元鎮公為司勳郎官乃言自王安石用事肆
為紛更祖宗之法掃地而生民始病蔡京托名紹述盡祖安右
之政以致大患今安右猶配享廟廷而京黨赤族何以收人心
召和氣哉言行錄

遠秦檜擅事

宋陳文正公康伯字長卿自公為郎時為司勳郎官秦檜方擅
事公雅有素望乃澹然其中檜雖稱公靜重常越用他人公不
以為意在省五年始為軍器監同上

考選科

諸科選 文資選 右職選 官中選
諸司選 除由 磨由 司計

監當官別置外選

○舊考功

歷代沿革漢曹郎二人掌天下歲盡集課元帝時京房作考功
課吏之法然其職不在尚書至光武改尚書二人曹主歲書
考課課諸州郡魏尚書郎曹有考功郎中一人宋齊並置功
論郎中梁有功論侍郎隋文帝置考功侍郎煬帝改考功郎
唐龍朔改為司績大夫武德舊考功郎中監試貢舉人正

觀以來乃以考功員外郎專掌首舉省郎之殊美者至開元
 移首舉於禮部而考功員外郎分判而已宋考功判司事
 人以帶職朝官或無職事朝官充凡考課之法分隸他司或
 以他司專領本司但掌覆太常擬謚及幕府州縣官流外較
 考之事元豐官制行郎中員外郎始實行本司事續會要初
 除蔡洵蔡京職專掌文武遷敘磨勘資任考課之政令凡命
 官隨所隸選以其職事具注於曆給之於其屬州若司歲書
 其功過應升遷選授者驗曆按法而敘進之有負殿則正其
 罪罰以七事考監司以四善三最考守令凡改服色者以年
 勞計之應謚者覆太常所定行狀報尚書省官集議以聞凡
 立碑竭名額之事掌之舊置考課院其定殿最皆有考辭元

無專曹官有考選科以令史分頭主之

羣書要語掌文武百官功過善惡之考法凡百司之長歲較其
 屬功過善惡以九等大合眾而讀之流內之官敘以四善善狀
 之外有二十七最唐百官志及功臣家傳碑頌誅謚等事同上
 主羣吏之課而議其誅賞郎於天臺任屬尤重會南豐除蔡京
 計羣吏之治而明黜陟之法臺郎典引列於左曹又除日和卿
詩句稱意新官又少年秋清身健好朝天白樂天送崔考功

古今事實

鶴廳

唐考功員外郎廳事有薛稷畫鶴宋之間為贊西京雜記

南曹見後裴誦事

挾印赴行在

唐裴諲遷考功郎中代宗幸陝諲徒挾考功南曹印赴行在上
曰疾風知勁草本傳

墨書絕吏奸

唐王徽轉考功員外郎時考簿上中下字朱書吏緣為奸多有
指改徽白僕射請以墨書

鄭澣敏識

鄭澣為考功員外郎刺史有驅迫人吏上言政績請刊石紀者
澣探得其情條奏庶使巧迹遂露人服其敏識分紀

仲舒文名

王仲舒有文名遷考功員外郎奏議詳雅省中伏其能

辭判精密

裴埴遷考功員外郎侍郎鄭珣瑜考校辭判研覈精密皆值才
實

典選平允

嚴挺之開元中為考功郎中典選二年大稱平允並本傳

進絀清明

席豫遷考功員外郎進絀清明拜吏侍元宗曰卿考功職詳事
允故有今授

黜陟詳當

趙宗儒傳正元六年領考功事黜陟詳當無所回避
不避權倖

穆宗即位召李渤為考功員外郎校定京官考不避權倖皆行黜陟

務覈實才

唐王位傳開元初遷考功員外郎異時多請託丘務覈實才

吏無以欺

王仲舒字弘中在考功吏部提約明悉故吏無以欺

韓文正公神道碑

人以為便

考功員外郎魏砥字邦達守監察御史砥在考功郎選案牘不存吏緣為奸川陝官到部者多以微文沮抑往反輒經年砥請細節不圓處悉先放行人以為便

中興系年錄

非蘇不可

韓休作蘇題集序云屬考功員外郎關時中書令李嶠執筆曰考功郎非蘇君不可遂拜考功員外郎

得王遂清

王信字成之權考功郎有選人張公選初一年免銓至是改秩更妄引復令扼之公鈎察其故吏怖服又有二蜀士實礪式吏受賂為道地趙衛公為工書以囑公持弗聽已而轉臨天官閣審成績拊掌慨歎嗟激不已至曰于上前他日上謂尚書員外郎曰考功得王信銓曹遂清邏者私相詣指為神明

同上

謚政文莊

宋劉敞判尚書考功仁宗賜夏竦謚曰文正敞言謚者有司之事也竦之行邪而陛下謚之以正不應法疏二上仁宗為更竦

事若鄰粒新集勸學
謚曰文莊 東都事畧

選指神明 見上得王遂清

古今文集

律詩

送考士崔郎中赴闕

白居易

稱意新官又少年。秋涼身健好朝天。青雲上了無多路。却要徐
驅穩着鞭。

詩話

專心望考士

唐王尚客為侍御史。自以才望清華。妙當入省。常望前行。忽降
膳部員外郎。微有愧悵。張泰忠詠曰。有意嫌兵部。專心望考士。

誰知脚股脰。却落省牆東。

新編古今事文類聚新集卷之十一

終

早稲田大学図書館

011488554095